

Khutba Jummah

HAZRAT MUHYI-UD-DIN AL-KHALIFATULLAH

Munir Ahmad Azim

06 Mai 2016 ~
(28 Rajab 1437 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba Jummah lors « **Ki Été L'Islam? »:**

KI ÉTÉ L'ISLAM?

Couma mo ti explique zot vendredi passé, le mot « **ISLAM** » vine de racine arabe « *silm* » ki veut dire la « paix ». Mais en ce ki concerne bane dimounes dans bane différents pays ki fine accepté l'islam sans hésitation, surtout bane ki pas trop conne la langue arabe, zot pas capave comprend complètement la grandeur et signification exacte de l'islam. Donc, mo fine pensé ki aujourd'hui, dans mo Khutba, mo pou contigne mo explication lors sa sujet là : **Ki été l'islam?**

Mo bane chers frères et sœurs, l'islam c'est saki faire lé cœur de l'homme fonctionné et li faire revivre le corps et l'âme de la race humaine, et de tout bane créatures ki trouve dans bane les ciels et la terre. Quand nous guette la beauté de la création de bane les ciels et la terre ki trouve tout autour de nous, alors tout sa beauté de création là renferme dans li le témoignage ki tout sa ki li été, ena ene Grand Créateur ki fine créer li. L'existence de l'ordre et la conception dans l'univers ki la science moderne, grâce à bane recherches intenses, fine vine enseigne nous c'est ki nous bizin croire dans l'existence d'ene Pouvoir Suprême et ene Intelligence Suprême ki responsable de sa conception complexe, mais ordonné là ; ene tel Être suprême ki donne l'existence à tout sa là et ki fourni li tout saki li bizin pour ki li vivre, et pour so croissance aussi. Bane nouvo recherches fine également permette bane découvertes azordi zour de bane nouvo galaxies ki proches de nous galaxie, bane telles découvertes ki enrichi d'autant plusse la connaissance de la science en céki concerne la grandeur d'Allah et So grand puissance. Ainsi, nous trouver ki même la science moderne à travers so bane innombrables recherches zot fine arrive à prouve comme vrai bane paroles d'Allah, couma Allah fine établi dans bane Écritures Saintes – en particulier dernière la loi ki Li fine révélé, le Quran Shareef.

L'Univers, couma nous fine apprane dans science li ene organe complet ki so bane parties zot reliés entre zot dans ene bien zoli façon et dans l'harmonie. En plisse de sa, sa li trouve dans domaine de la loi ki spécifier ki sak particule exister et déplacer avec soumission dans ene cours ki la loi (c'est-à-dire, la loi divine) fine prescrire et établi et ki pas capave changer. Ni bane planètes énormes ki trouve dans nous système solaire (et bane les autres galaxies d'ailleurs!), ni bane tipti particules de la terre ki contenir la vie pas capave dévier même légèrement de sa cours là. Zot la vie c'est ene la vie d'ene soumission complète, et zot vive strictement d'après bane la lois d'Allah, et zamais zot dévier de zot chemin ou de zot but. Alors, en vérité, zot la vie c'est la vie de l'Islam ki veut dire la soumission à bane commandements divines. En d'autres mots, zot bane musulmans. Le Quran Shareef faire référence à sa vérité là dans sa bane paroles là:

Et tout saki dans les ciels et la terre soumette à Li, bon gré, mal gré et c'est vers Li ki zot tout pou rassemblé. (Al-Imran 3: 84)

Sél exception à sa règle générale là c'est l'homme. Li unique dans l'ensemble du domaine de la création dans mesure kot li possède non seulement la faculté pou raisonner, mais aussi li ena so libre arbitre. Sa ranne so cours d'action et motif de so comportement imprévisible. Nous capave prédire action soleil, parski li fonctionné en vertu d'ene la loi établie et pas possède la liberté pou écarte li de so chemin ki fine prescrire pou li, mais nous pas capave prédire même kitchose dans le cas de l'homme. L'activité de tous bane kitchoses de l'univers li strictement dans ene l'ordre ki fine fini planifié et ki équilibré, mais zis l'homme tousél fine recevoir permission pou choisir so chemin dans la vie. Li capave soit construire ou détruire li-même, et sa pou ena bane conséquences pour li dans *Aakhérat*.

De ce fait, par rapport au reste de la création, l'homme capave choisir so bane extrémités et li capave prescrire aussi bane moyens. Concernant sa, li alors compte lors so pouvoir pou raisonner. Mais de sa façon là, li commette bane erreurs. Li capave réalise en même temps bane grand kitchoses, bane grands travaux, et en même temps aussi li capave tombe finalement dans confusion. En d'autres mots, sa même faculté ki ene bon z'outil pou li, ene plusse pou li, alors sa même z'affaire là (en l'occurrence, so raisonnement) vine l'instrument de so la perte uniquement à cause de so mauvais utilization. L'intellect humain pou capave guide li selman ziska certain limites, parski li fonctionner lors baze de bane faits ki connu afin pou découvert bane kitchoses ki inconnu. Li capave servi efficacement dans ene certaine mesure dans le domaine de la réalité physique, mais kan li rentre dans le domaine de la vérité fondamentale kot premier exigence pou arrive à sa verité fondamentale là c'est ki li bizin possède ene connaissance approfondi du passé, du présent et du futur, alors faculté raisonnement de l'homme pou capave selman donne bane l'opinion ki peut être pas basé lors la réalité et la vérité. Li capave servi so l'intelligence selman à certaines limites et pas capave donne bane

réponses ou l'opinions ki basé lors vraie la vérité de bane kitchoses. Li pou capave selman donne ene l'opinion ki la plupart du temps ki loin de la réalité et de la vérité fondamentale.

Dans so nature même, l'homme li incapable pou découvert bane vérités ultimes de la vie. L'âme humaine li toutefois obstiné pou conne sa bane vérités ultimes là, parski sans sa bane recherches pou conne sa bane vérités ultimes de la vie, alors pour li, l'homme senti ki li pas fine arrive à so but, et si li pas fine réussi conne sense réel de la vie et ki sa reste sans explication, alors le vrai code de l'activité de l'homme reste pas fixé même. Li senti li mal à l'aize. Li rode conne plisse. Alors la science pas pou capave fourni nous sa bane explications et faire nous arrive à sa bane vérités ultimes là, parski la science li traite selman de la réalité physique immédia; la philosophie non plus pas pou capave fourni nous sa explication là, parski li fonctionné lors bane suppositions, bane propositions et bane principes de base.

C'est à sa stade là ki l'âme de l'homme crié, li fer sa appelle là fort dans li pour ki li recevoir la guidance d'Allah, la guidance d'ene Bondié ki Tout-Puissant, ki possède Pli Grand Puissance ki capave exister, ene tel Bondié ki Invisible à l'œil nu, mais Qui représente la source de tous bane la vie, car sa Dieu là (Allah) Li-même Li la Vie. Le fait ki li pou impossible pou l'homme pou alle pli loin sans le soutien d'Allah, alors so l'âme ena sa désire là fort dans li pou li gagne ene telle la lampe, ene telle torche ki pou capave éclairer so chemin et ki li gagne ene Guide ki pou capave donner li bane directions ki basés lors bane connaissances ki sûre. L'humanité bizin ene telle orientation (guidance) sûre, ki positif et complet, et sa même Créateur ki content So bane créatures là, et ki soutenir nous (et subvenir à nous bane besoins) et ki soutenir l'univers en matière de bane besoins physiques fine également prend lors li-même pour donner sa besoin vital là.

L'histoire de l'homme témoigne le fait ki la religion existé depuis le début de la vie de l'humanité lors sa la terre là. Sa montré ki le Miséricordieux (c'est-à-dire, Allah) fourni bane conseils à l'humanité en même temps que so création afin ki li pas ena pou tâtonner dans l'obscurité et ki li capave marcher lors le chemin de la loi en conformité avec so nature. Bane ki Allah nommé (choisir) pour donner sa bane directives là zot connu dans terminologie de la religion comme bane Prophètes et Messagers. Zot recevoir zot-mêmes bane directives sous forme de la révélation divine et kan présente sa bane révélations à bane dimounes sous ene forme écrite, alors sa li connu comme ene écriture ou ene livre révélé. Le Saint Prophète Muhammad (saw) ti le dernier prophète porteur de loi ki fine gagne bénédiction pou recevoir bane lois finales d'Allah ki contenu dans le Quran Shareef. Sa li en aucaine cas veut dire ki Allah pas pou cause avec bane les autres de So bane serviteurs dans la Communauté de So bien-aimé prophète Hazrat Muhammad (saw) ou ki Li pas pou inspirer So bane serviteurs pou écrire bane informations ou révélations ki zot recevoir de Li afin pou profiter l'humanité. Non! Sa bane livres là zot nek bane livres de révélations, et non pas bane la lois d'Allah couma pour le Quran Shareef. Tous sa bane livres ki inspirer ou révélés bizin obligatoirement en ligne avec bane commandements Quran Shareef et zot bizin respecté l'authenticité Quran Shareef et so

sainteté. Seul bane prophètes porteurs de loi ti honoré avec bane Lois ou Écritures Divine, et le contenu de sa bane écritures fine touzour reste bane la lois ki le Créateur de l'univers fine nommé pour bon guidance de l'humanité, parski c'est Li même ki sa Dieu, sa Maître ki fourni l'univers et l'homme aussi de tous so bane provisions, ki li manger physique et aussi manger spirituel aussi, et alors le Quran Shareef li le dernier de tous sa bane la lois là, kot li représente ene l'ensemble perfectionné de tous bane lois ki pou reste touzour vivant ziska le Jour du Jugement Dernier.

Le but de la guidance fine touzour pou enseigne à l'homme pou soumette li à la loi divine kot sa l'attitude là li exprimé en arabe par le terme « *Islam* ». La Guidance Divine oulé ki l'homme agir et comporte li conformément à la loi de so véritable nature et li servi so l'intelligence et liberté afin pou accepter so nature comme étant ene créature soumis d'Allah. Même si li pas fine créer pou conforme li à bane la lois de la nature d'ene façon mécanique couma le reste de la création, mais li ena le devoir difficile pou cherche la vérité et pou conforme li à sa vérité là, et donc par rapport au reste de la création, si li réussi dans so bane épreuves, so bane bon récompenses pou bien bien grands, pas pou capave compter même ! En d'autres mots, nous capave dire ki la direction divine oulé ki l'homme li vine musulman. Le Quran Shareef dire:

C'est sa la nature (fitra) ki Allah fine donne bane dimounes depuis le commencement – pas ena changement dans création d'Allah. C'est sa la religion de la droiture; mais la plupart de bane dimounes pas conné. (Ar-Roum 30: 31).

Sa guidance d'Allah (twa) li pas limité à ene groupe ou ene communauté, mais sa guidance là fine être envoyé à tous bane nations et tous bane races du monde. Allah fine accorde So bénédiction dans ene façon universelle pareil couma Quran Shareef dire :

Et pas fine ena ene nation ki pas fine recevoir ene Avertisseur. (Fatir 35: 25).

Ainsi, l'histoire fine conserve bane noms de certains d'entre sa bane avertisseurs ou prophètes là, tandis ki bane noms et bane travaille de beaucoup d'entre zot fine oublié par bane dimounes. Parmi bane ki zot bane noms fine reste encore dans mémoires de bane dimounes et ki fine mentionner et préserver dans Quran Shareef ena : Adam, Nuh, Ibrahim, Ismail, Ishaq, Yacoob, Yousouf, Moussa, Dawood, Suleyman, Zakariyya, Yahya, Isa et Muhammad (saw).

Le plus grand de bane prophètes, Hazrat Muhammad (saw) ti paraite dans 7^{ème} siècle de l'époque chrétien, et li ti appelle l'humanité vers le chemin de bane anciens prophètes et li ti présente au monde le Quran Shareef ki contenir la loi ki fine enseigné par bane anciens prophètes dans zot forme ki pli parfait et pli complet. Bane dimounes fine appelle par différents noms bane l'enseignements de bane professeurs (spirituel) ki fine vini avant, tel ki le judaïsme, christianisme, etc. Le Saint Prophète de l'Islam Hazrat Muhammad (saw) ti vini pour fer zot

rappelle le vrai nom original et significatif de la religion d'Allah, à savoir l'Islam. Li fine déclaré et sa déclaration là fine recorde pou tout les temps dans Quran Shareef:

En vérité, la religion d'Allah c'est l'Islam, c'est-à-dire, la Soumission complet à So Volonté et à So Guidance. (Al-Imran 3: 20).

Et Allah Le Tout-Puissant fine aussi dire:

La foi de zot papa Ibrahim c'est zot la foi. C'est Li (Allah) Qui fine appelle zot musulmans. (Al-Haj 22: 79)

Encore ene fois, Allah Le Tout-Puissant dire dans Quran Shareef:

Ibrahim ti ni ene Juif ni ene Chrétien, mais li ti ene dimoune droite ki ti pé soumette li entièrement à Allah (li ti ene Musulman). Et li pas ti parmi bane ki donne Allah bane associés. (Al-Imran 3: 68).

Donc nous percevoir l'Islam couma sa la religion, sa façon de vivre naturelle de l'homme là ki exister depuis la création de la race humaine. Nous tous, nous appelé par Allah pou vine bane musulmans, pour nous soumette à Li. Voilà pourquoi dans le code parfait et final de la vie, c'est-à-dire, le Quran Shareef, Allah mette sa au clair ki nous vraie religion c'est l'Islam, et non pas aucaine les autres religions. C'est sa, c'est-à-dire, l'Islam ki montrer sainteté (pureté) de nous relation avec Allah, parski nous ena dans nous le besoin pour nous soumette à Li (Allah) afin ki nous réussi atteindre bane hauteurs de So miséricorde et pou être considéré couma bane êtres complets dans So l'amour et So proximité. C'est en fait à travers l'Islam ki nous pou capave arrive à bane hauteurs et réussi vine près avec Allah. C'est zis dans la soumission à Allah ki nous pou capave réussi faire sa.

Ki Allah permette à sakaine d'entre nous pour réalise le véritable Islam dans so la vie quotidien, parski sa c'est nous but dans la vie. C'est sa l'Islam ki trouve à l'intérieur de nous ki bizin illumine le monde entier, et sa l'Islam là li ene don d'Allah pour aide nous pou perfectionne li afin ki nous capave agir couma bane véritables guides pour la réforme de l'humanité et pour guide bane dimounes vers Allah. *Insha-Allah, Ameen.*